

SUHANO

YOHANES

KATOLU PAKUNO

Kaatono Wamba

Weo suha katolu pakuno ini, Yohanes nokona wutono “Kamungkula neangkando umati”. Nopakatue ne seemie neangkando umati konea'aono Gayus. Anoa nopudhi Gayus hampano notulumie mie lumilino meowano Bhihita Metaa, tamaka nofe'ulaiane dua nakodhaga ne seemie konea'ano Diotrefes.

Kalengkano suha

1:1-4

¹Bhahitieu Gayus nemoasi'aoku! Suha aini nomai'ao ne idi, kamungkula neangkando umati, aoasiangko mpuu. ²Bhahitieu nemoasi'aoku, aguhaangko sio-siomo sadaa-daa mengkoha-ngkoha weo kataano namisi bhe katotomata, pedamo dua alusumu same-taa. ³Nowula mpuu laloku afetingke ne bhahitie'i marasaeano humato kanau, detula-tula'ao kakampuu-mpuuno lalomu dadi angkafi kabanara. Ingka daanumo weo dadimu sadhia angkafi kabanara. ⁴Pae bhe so moliuno kawulano laloku afetingke ana'iku dodadi doangkafi kabanara.

Kapudhi so Gayus

1:5-8

⁵Bhahitieu nemoasi'aoku! Nokampuu-mpuu lalomu weo kahadhaamu ondofao bhahitie'i marasaeano, mahinggamo mengkahatono. ⁶Andoa padamo detula-tula'ao kanini kaasimu ne wisendo umati marasaeano ne ini. Naetaa mpuu nehabumu itu ane tulumida damopansuhu kala-kalando. Habu medano na'a ingka meka'ianomo lalono Lahata'ala. ⁷Kapa'amo kakala'ando deowa Bhihita Metaa, so dameompu'ao ne Kristus, bhe miina dakoniala mai'ao ne

mie tapa marasaeano ne Kristus. ⁸Dadi'anomo intaodiomu tabeano nahumelasi lalontoomu damotiampe bhahitie'intoomu peda andoa itu. Nadamo aitu intaodiomu dealamo dua dawu weo folele'ano bhihitano kabanara.

Diotrefes dofo'alae, Demetrius dopudhie

1:9-12

⁹Ingka padamo aebuhi suha seendai so umati ne itu, tamaka Diotrefes miina napokiha'ianea kalentuku, kapa'amo gaono naembali neangkando umati. ¹⁰Dadi'anomo ane amai kaowu, atumalesaane sabhaha habu modaino bhe wamba kabuangkano nopulao'ao insaodi. Bhahi-bhahi'ae ini miina'o dua natumumpuane lalono, sampe nokiido natumahima bhahitie'i mengkahatono. Suano kaowu ta'o ana'a, bhahamo umati dua sigao'ano no'ele'aanda datumahima bhahitie'i mengkahato maitu. Ane miina damangkafie, nofogampida mai'ao ne kase'isendo umati.

¹¹Bhahitiekunemoasi'aoku! Koise mesandaha ne habu modai tamaka ne habu metaa. Sasuka humabu metaano, ana'inomo Lahata'ala, tamaka sasuka humabu modaino miina'o sepali'a namande'ao Lahata'ala. ¹²Tamaka Demetrius, ingka kosasawindo umati dopudhie; daanumo ne dadino notiwohamo sepali'a noangkafi kabanara. Insaodi tasakusiiane dua tapudhi habu metaano, maka ingka pande'aane kasakusii mani ini nokotu'u.

Kasongkono suha

1:13-15

¹³Nandoo nobhahi sepali'a so nefohato'aoku ne hintu, ampamo kaowu naetaa pae abuhie ne suha. ¹⁴Aposahuna'ao naehimba dapo'awa toha maka daetula-tula dapowise. ¹⁵Sio-siomo napobhaiangko katohopono dadi. Sabhangka'imu we ini dopakatuangko salam. Fosampe kanau dua salam ne sabhangka'intoomu seemie-seemie.